

四庫全書

集部

欽定四庫全書

集部

武夷新集卷八

詳校官監察御史_臣李陽樸

檢討_臣何思鈞覆勘

總校官中書_臣朱 鈐

校對官中書_臣葉 災

謄錄貢生_臣左熙世

欽定四庫全書

武夷新集卷七

宋 楊億 撰

序

十七首

溫州聶從事雲堂集序

雲堂集者永嘉從事聶君茂元試吏牯蒼日所賦詩也
君雍熙三年舉進士策名乙科由一命隨牒茲郡屬仍
歲大稔比戶小康賦輿先期獄訟滋少盤牙悉解郡閭
鮮簿領之勤燿火不驚幕府無書檄之事婉畫勿用善

政已成飄飄然其於遊刃固有餘地矣於是占勝選奇
尋幽覽古名山福地必命駕以遊美景良辰乃登高而
賦精驚八極智周萬象觸類有得少選成章信所謂造
次顛沛必於是者也其或心將化馳意與境會聞簫韶
者不知肉味逃虛空者蔑聞人聲追鴻濛而與遊搏扶
搖而上擊其探賸也若求玄珠於赤水索金簡於丹臺
其得雋也如縱涸魴於西江騁歸鴻於碣石故再歲之
內所賦凡二百篇東甌山水之清麗縉雲謠俗之朴古

佛刹玄祠之標槩訟庭官舍之形勝見於題詠之什矣
一郡人物之選一時寮佐之盛林谷高蹈之士吳楚薄
遊之賢備於贈答之作矣名邦風物之美通人吏隱之
適齊氓富壽之樂居上神明之化形于唱和之篇矣若
乃國風之作騷人之辭風刺之所生憂思之所積猶防
決川泄流蕩而忘返絃急柱促掩抑而不平今觀聶君
之詩恬愉優柔無有怨謗吟詠情性宣導王澤其所謂
越風騷而追二雅若西漢中和樂職之作者乎君素工

於詩及載筆從軍又得茲壤前後左右陟降俯仰皆青山白雲茂林修竹嗜欲之物旦暮在前矧又旁晚石門謝公遊歷之所却瞻東陽隱侯賦詠之地精爽未泯風流尚存宜乎聶君之於詩彌所感發豈二子之風期昭合潛有欣助歟而此都之靈粹閔蓄將有散越歟不然何其得之多也去年予假守是邦今年通理虞曹外郎常公將命賦民鹽於隣郡既飲至且達聶君之命以集為貺而序是求雅意甚勤飾讓非禮聊叙梗槩以塞其

請若夫咏歌嗟歎之不足識者開卷而盡見也豈僕倦
談者所能一二乎

送進士陳在中序

昔孔子五十而讀易以至韋編三絕然後知天命之終
始自衛反魯刪詩定書樂正雅頌各得其所六籍既立
百王由是取法焉蓋夫易者世歷三古人更三聖達性
命之際通神明之德探賾索隱鈎深致遠故曰易不可
見即乾坤之道幾乎息矣若乃春秋詩書禮樂猶五行

之更用事而易為之原古者十有五而志于學既耕且
養三年而通一藝三十而五經立也至於學易必俟夫
四五十豈非心志未定不可以叅陰陽之變涉獵未博
不可以覩聖哲之奧至有屑腐齒落塊然面墻其或沿
波討源翦焉先覺黜章句異端之說研彖象極深之旨
不俟知命之歲不求一卷之師天人之占鬼神之變消
息盈虛之理吉凶悔吝之徵自明而誠若指諸掌非夫
稟人倫之上智得天下之至精其孰能與於此乎賴川

陳君世家甌閩寢處墳索少好易象洞達其要嘗慷慨
發憤以學者傳授失其宗本去聖逾遠亡羊多岐大懼
夫義文之微言將墜于地乃鋪衍遺意發揮成文作賦
六十四篇篇演一卦之義前年從賦南安郡薄遊上都
扣門造予以賦為贄予一見而甚駭之也深者厲之堅
者鑽之高者跂而望之幽者俯而探之汗漫無際者凌
厲以求之窈冥無狀者罔象以索之隱几彌旬恍然有
得或談於臺閣僚友或語於場屋流輩聞善如響爭取

以觀於是陳君之名一旦籍甚所謂易賦者亦盛行於
時既觀藝澤宮不利攸往蓋聿來下國勦無先容新羈
之足爭據於要津寒谷之苗不沾於暖律非戰之罪也
其勢使然乎退歸舊廬高卧環堵今年予典郡甌越命
駕爰來乘桴浮海冒風濤之險杖策徒步越嶺嶠之阻
將以生平素業伸於已知若予之孤陋迂濶何足以當
之哉陳君其亟隨鄉書使卜西笑有司方選擢寒雋牢
籠英傑以副萬乘虛左側席之意君博綜文史詳練經

術詞彩奮發學植堅深取片玉於崑崗之巔影華纓於
文石之陞可以俯拾未足為難矧乃行有餘力深窮繫
象天子方復三代之制開庠序聚生徒選經明行修之
士列於學官以教胄子如君醇儒當中茲選僕謂君明
聖人之道將有以及于生民揚于王庭宜取顯位一博
士之任豈足為君辱哉勉哉西遊努力加飯

送覲道人歸故詩序

浮屠依覲師建安吳興人少落髮為桑門棲雲居山結

草茅為廬與猿鳥雜處日中一食凡數年矣鄉人慕之
爭携糗糧茗荈鹽酪以詣其所或稽首膜拜精意懇至
迎至其居作佛事以祈福師亦不能却之然心殊不喜
鄉人以師所居風雨之不庇也營棟宇作像設經始弗
亟輪奐惟新師外形骸黜健美行不累俗居無求安崇
臺廣廈非其所樂也精舍既成俾其徒糞除之轉詣窮
僻緝木皮為方丈室採草實以食鄉人聞其徙也從之
如初凡三徙居所至成市豈重華之有羶行莊周所謂

全德何不言而化不召而至之如此乎師徧閱金仙之
書深求祖師之旨一念懸解五蘊皆空雖寓跡禪林而
棲心道要端居岩石結志區外虛室生白精義入神乃
至授玉篇於東華得素書於黃石駭青虬而翳華芝神
交於肪蠶餌金膏而咽瓊液功成於俄頃步越峻嶺若
履平地年殆知命宛然童顏或天高月明萬籟俱寂必
攝衣杖策深入窮山俯絕壑之傍坐大石之上鷲獸馴
擾毒虺屏去咽氣養和踰月廢寢瞑目隱几彌年不食

忽與俗接未嘗自異固已飛名仙籙高蹈玉晨豈但蟬
腹龜腸吐納以蠲疾熊經鳥伸導引而為壽哉予少遊
風波之塗早別粉榆之里危未脫於羿彀疾莫造於醫
門淳化末請告歸寧師惠然訪我以長生度世之旨誨
予予正為利祿所啖旅火內迫且辭以未能去年出守
縉雲師前期未忘冥感潛契蓋以收視反聽未嘗夢想
者二十年及予南轅之夕師油然欠伸髣髴假寐夢遊
縉雲括蒼之間若有靈仙真人授以金簡玉字之訣遂

遽形開之後恍然起薄遊之心及予蒞郡十旬師即振
錫而至盤桓數日便為仙都之行採靈首探隱穴旬有
八日拂衣言旋予得再膝席於郡齋瞻師眸子瞭然若
志已滿必吉夢是踐而至理玄同方內之人何從請益
丹臺綠檢非下士之得窺赤水玄珠豈離婁之能索心
期已畢歸艤靡留棹舉若飛目眇不及異日世緣既盡
宦遊亦厭終須挹浮丘之袂追赤松之遊大丹若成當
分我半劑得為地仙足矣豈但使雞犬舐鼎乎嗟嘆之

餘復永歌而為好

詩附

跡寄浮屠教心將汗漫遊無眠長達曙却立動經秋
秘訣神仙授靈苗洞壑求誅茅探虎穴投杖涸龍湫
丹熟爐應冷禪餘室更幽登山不累息入夏亦重裘
名已標真籍身猶隱沃洲逍遙訪巖穴迢遞別林丘
徧覽縉雲境還浮一葉舟三千功欲滿鶴馭恐難留

溫州聶從事永嘉集序

河東聶君昔從事縉雲日賦詩二百篇予既序之矣及
隨牒永嘉再見閏月所得彌廣凡七百章會秩滿北歸
假道敝邑又示予以新集且徵辭焉予才非患多學素
不足已嘗弔勉從命狂簡成文運族庖之刀一割猶可
毆市人而戰再鼓必衰深病未能豈足以辱而君之請
彌篤且予之讓莫諧固不暇揚摧而言但撮其梗槩而
已謹按君生齊魯禮義之國被陶虞文思之化方在髫
髻服膺儒玄徧討百家之言深窮六義之要以為詩者

妙萬物而為言也賦頌之作皆其緒餘耳於是收視反聽研精覃思起居飲食之際不廢詠歌門庭藩溷之間悉施刀筆鳥獸草木之情狀風雲霜露之變態登山臨水之怨慕游童下里之歌謠事有萬殊悉財成於心匠體迨三變遂脗合於天倪當其奉鄉老之書以詣貢部也袖詩千篇名動場屋宗伯推國士之遇異於衆人天子嘉制策之文遷為第一自是捧檄吳會改轅海嶠東甌舊壤於越遺俗民庶謹厚既卧理之有餘林嶺蔽虧

實賞心之斯會其或良辰美景賓朋宴集之盛名園別墅軒車遊覽之適公堂退食蹈泳無何之鄉王澤及人賡載中和之什寓物必賦援筆而成與夫陳思豆萁之詩止於七步淮南離騷之傳不越食時以敏言之蓋其倫矣然君之於詩也類解牛焉投刃皆虛譬射鵠焉舍矢如破彼唇腐齒落者所貴乎少我取其多彼觴鰾肉緩者咸謂之難我以為易獨擅一源之利不見異物而遷扣寂求音應之如響觸物成詠思若有神蓋孔子云

少成若天性習慣若自然斯之謂也矧乃酌之不竭鑽
之彌堅兩郡之間千里而遠玄祠佛刹罔不標題都人
士女悉已傳誦南山之竹可盡而雅言無窮東郭之貌
雖疲而逸材方騁英詞滿於裔壤藻思泄於尾閭蓋猶
夫吳玉金錢往往有之淮陰將兵多多益辦者已方將
捧持素業奏御天子予固知採其頌聲埤于樂府被之
箎弦薦于郊丘有日矣至如升金門上玉堂履赤墀之
塗登文石之陛亦將在是舉也稽古之力其可誣乎謹

序

羣公贈行集序

予至道三年十一月受詔修先朝國書越明年八月書成奏御既而以太夫人有桑梓之戀求典近郡因奉甘旨九月詔領縉雲郡事拜命之翌日復留不遣再䟽懇激得請而行公卿巨儒臺閣髦士寮案之際朋從之間相率贈言以寵行邁者凡三十八人藻繡紛錯珠璧炫耀觀咸洛之市天下之貨畢陳入宋魯之邦先王之禮

盡在亦以見一時文物之盛豈獨為鄙夫道路之光昔者楚丘列諸侯之末有遽瑗史狗史鰌公子荆公叔發公子朝分執國政故吳札歎曰衛多君子西京承三代之季有朱買臣吾丘壽王司馬相如主父偃徐樂嚴安枚臯膠蒼終軍嚴葱奇並在左右故史班稱曰漢之得人魏魏聖朝英俊咸集爵里鱗布頌聲奮發覽之者足以知多士在位周室以寧七子賦詩鄭志斯見何止金聲流於下國華衮被於薄軀而已哉既銓次成編輒數

述其事蓋取夫卜商作頌以冠二雅之首用無媿焉

羣公餞集賢錢侍郎知大名府詩序

昔漢宣帝有言曰國家不虞邊境有事左右之臣皆將帥也乃知登勇爵者不必專閭外之政服儒術者足以升大將之壇其所由来舊矣去年冬鑾輿北巡遠馬南牧乃眷全魏之地實介兩河之間駐蹕以壯其軍聲擒俘屢獻於行在既而振旅愷以入求節制之才疇庸舊臣作鎮茲壤廉頗年高不能用兵趙孟語偷未可為政

於是命大京兆長城公由冬官貳卿兼書殿史閣之職
出領府事軍中之務一以咨之且謂之曰倚卿為北道
主人使朕得高枕而卧矣寵錫異等祿秩有加十乘啟
行百壺出餞虬髯列侍師律載嚴鶴蓋成陰送車無數
於時搢紳大夫相與言曰汲黯卧治郡政自肅劉琨坐
嘯塞垣以清當使朔野無烽燧之驚生民免杼軸之困
偃息談笑立銷兵氛投壺雅歌益治軍簿俾天下之人
知敦詩閎禮真將帥之具坐籌決勝敵百萬之師巍巍

帝皇知人而善任使也昔者季布治郡天子倚之股肱
申伯于藩吉甫形于歌頌蓋為詩什以道德美由是學
士承旨宋公而下作者凡三十人奇彩彪炳清詞藻緝
入孔子之宅金石絲竹以盡聞遊和氏之場珪璧琮璜
而皆在與夫七子之賦鄭志羣公之祖二疏蓋不侔矣
某外領使符歸在秋暮辟書始下不及王粲之從軍雅
言畢陳竊比卜商之作序蕪陋簡略何足以云謹述

送致政朱侍郎歸江陵唱和詩序

侍郎朱公以舊德名儒榮居禁署引年致政將及禮經
宴見從容屢以歸田為請封章激切且有乞骸之言皇
上重違桑梓之情式優筋力之禮不欲煩於耆耄予以
厚其寵章特拜文昌貳卿許歸江陵別墅宰邑以愛子
俾晨夕而承顏下詔於長吏令歲時而致問延見甚久
益推前席之恩賜予實蕃有助揮金之費給公乘以濟
行李供祖帳而伸飲餞祁奚老矣猶以政事而諮詢宣
父歸與豈憂吾黨之狂簡天子恩禮之敦篤賢者進退

之光華行路之人形於歎息薦紳之士以為美談區區
二疏非可同年而語也太宗伯太原公嘉達人之知止
美公朝之尚德嗟嘆不足形於咏歌為長句二百二十
有四言揄揚其事羣公屬而和者凡十有二人藻繡紛
敷琳琅焜耀登于樂府何愧中和樂職之詩布於郢中
足掩陽春白雪之唱雅言四達頌聲載揚俾貞退之有
光致風俗之歸厚太原公之意豈徒然哉某猥以非才
獲聯高韻曾垂量力寧足起予且奉話言俾之序引爚

火不息昔已接於餘光糠粃在前今復慙於首冠承命
增惕叙事非工僂俛含毫詞不逮意謹序

廣平公唱和集序

昔者鄭國名卿賦詩者七子郢中高唱屬和者數人善
歌者必能繼其聲不學者何以言其志故雅頌之隆替
本教化之盛衰儻王澤之下流必作者之間出君臣唱
和賡載而成文公卿宴集答賦而為禮廢之久矣行之
實難非多士之盈庭將斯文之墜地皇宋二葉車書混

同端拱穆清詳延俊乂臯夔稷卨日奉吁俞枚馬嚴徐
竝在左右禮樂追於三代文物邁于兩漢有若翰林主
人大宗伯廣平公以才識兼茂治行第一登金門上玉
堂發揮帝謨潤色大業自太平興國迄于咸平凡歲星
再周於天矣而望實益峻體貌彌篤入奏武帳天子冠
而後見退食溫室家人問而不言挺山甫之將明推安
世之慎密作文章盟主實朝廷宗工天其或者殆以公
為儒林之木鐸也而視草之暇含毫靡倦形于風什傳

於僚友同聲相應發言成章乃至文昌正卿宥密元老
蓬丘之長蘭臺之英爭奇逞妍更賦迭詠鋪錦列繡刻
羽引商爛然成編觀者皆聳廣平公感交游之疇昔慮
竹素之淪胥休沐之餘孜孜綴緝為之七卷以傳於世
頌聲奮發爵里森布著於簡牘垂厥方來當使仲尼刪
詩取周南而居首班固著論稱西京之得人蓋風化之
所繫焉豈徒緣情綺靡而已猥令紀述茂容固辭狂簡
孟浪慙於叙事云耳謹序

送人知宣州詩序

屯田卽某君稽古博達之士也始以偃商之文學決科
公朝終以龔黃之治行陳力官次凡再歷二千石皆以
課最揚于王庭今年解安岳郡章以博士涖曲臺方講
求典禮討論故實裨補闕漏脩起廢墜而有司舉考績
之典在尤異之日天子延見宣室勞問數四以尚書郎
職司起草羽儀中臺而戶口墾田漢官惟舊故以君領
屯田曹宣城郡號為興區襟帶江左而雙旌六纛唐制

甚雄故以君行太守事拜命之日縉紳先生咸以某君詩家者流而宣城乃謝公賦詠之地刻于金石被于琬紵鏘然遺音猶在人耳而君勢均於六義之際神交于千載之下吳中人士復聞正始之音楚客離騷且有江山之助亦由冥數良為美談於是蓬丘栢署諫垣史閣金閨之諸彥鴻都之碩儒莫不健羨景慕形於詩什或嘉其地雄萬井慰壺漿來暮之心或歎其道出故鄉有弩矢前驅之盛或稱清白之節與闔西而等夷或序離

索之情劇河梁之悽愴至於迷江南之佳麗談謝客之
風流地勝人賢殊時共貫其歸一揆蔑有異辭矧昔人
云亡為日滋久華輶繼軌名氏實蕃焦桐絕絃賡載殊
寡而君擅當世之譽為羣公所稱嗣續音徽聳動吳會
亦猶京兆善政前有趙張姑蘓能詩後推劉白豈偶然
哉君以治劇之能奉求瘼之寄所宜宣布王澤激揚頌
聲採謠俗於下民輔明良於治世當俾中和樂職之什
登薦郊丘豈但亭臯隴首之篇留連景物而已集賢右

史彭君實君之執友且緘諸公之作咨予為序如窺武庫駭神鋒之照人幸過屠門聊大嚼以快意輒茲冠首深用厚顏云耳

與內弟李休復序

隴西李生子之內弟也纔十數歲能屬文善楷隸性端謹介特外直而內溫不讀非聖之書不入非類之室孜孜為學匪懈州里之內名稱藹然咸平二年奉鄉老薦書就試春官氏實在高第揚于王庭天子以其新進少

年欲抑之俾進其業遂用旅退曾不屑懷去年本郡凡貢士三十八人實冠其首西望而笑與計吏偕方摩厲以須虛憍恃氣將乘長風而破巨浪運溟海而徙天池適有功總之喪不克其志懷寶待價豈慮迷邦杜門燕居亦云知命斯可尚也一日再拜而言曰夫名以定體有自來矣始肄業鄉校名宗元及舉進士更之曰瓊由瓊已來一不利見再不克就試禮部求所以易之者予應之曰復之六二休復吉象曰休復之吉以下仁也蓋

得位處中協比初九初九有仁德而能附順之所以為親仁善鄰之象復之休也左氏傳曰親仁善鄰國之寶也語曰德不孤必有鄰夫七日來復天地之心也照鄰殆庶顏子之德也處復而休擇鄰以德非君子儒者其孰能從事於斯矣宜更名曰休復字德鄰若乃率性循道自誠而明復之體也邁種務滋聿修無忝德之度也所宜探中庸性命之理無或怵迫親大雅明哲之士與之切劘使衆妙玄同虛室生白鳴謙受益心逸日休勤

而行之進吾往也固當立功立事為世偉人豈徒發策
決科智効一官而已古人恥名浮於實幸吾弟勉之哉
外兄某序

送四十舅翁東遊詩序

武寧茂才章公實先大夫之叔舅某之事公猶大父行
也始委質江吳為郡文學值金陵版蕩閩隅繹騷貞退
丘園不交世務及文軌混一聲教漸暨乃徒步萬里來
詣公車上書大言初慕方朔之自薦閉關却掃遽同馮

行之空歸自是屬鄉老之獻能隨計吏而西笑凡累詣
貢部皆敗於垂成益燕谷沍寒陽和靡及齊庭濫吹雅
鄭相傾終以不伐之姿困於新羈之足今年春官氏益
艱其選財三十取一意公必在籍中逮揚于王庭又闕
其名氏噫淹速之度有命在天實由數竒且非戰罪復
何足町畦於胸臆鬱陶乎心術哉昔平津六十始發策
決科卒登三事之位孟明三戰乃濟河焚舟終雪再北
之恥苟誠志敦篤德義充富雖日月之增逝終富貴之

來逼亦不必充詘殞獲倒行逆施然後為善宦也關東
有賢侯汝穎多奇士行當曳裾公府我冠初筵為元戎
之上客亦復升堂拜親傾蓋投分與諸生而締交繇是
名動京師聲振場屋拾芥甚易夫何遠哉韞櫝待沽在
此舉也臯壤黃落當拜迎于夷門之下車馬行色輒抒
意於河梁之篇非足風雅之云聊導離濶之思云耳

詩附

首夏清和月異鄉羈旅心丹枝未入手華髮不勝簪又

出夷門去還過汝水陰何人富高義相贈橐中金

送集賢李學士員外知歙州序

昔漢明帝云郎官上應列宿出宰百里王坦之亦云尚書郎正用第二人何得以此見擬當時雖含香握蘭趨走丹墀未甚重也爰暨唐室稍盛其選由諫官御史次補者為美遷迄于皇朝地望彌峻又有侍講金華之殿待詔玉堂之署典校天祿閣更直紫微垣外之即建行臺刺列郡持使節總百城故臺郎之貴過曩時遠甚集

賢學士屯田外郎李君在興國雍熙中以文雄於場屋
太宗皇帝凡五臨軒試郡國貢士君以英才傑出策名
甲科自爾隨牒於淮淝間為諸侯所賓禮奏伎記室檄
成而愈風案事隣州獄決而得雨入佐著作改丞太常
掌禮秩宗閱書廣內既而宰邑吳會有絃歌之音校文
成均正魯魚之謬英華外發名聲日聞天子知其藏器
在身勞謙不伐特出中旨召試禁林翰動若飛文不加
點北門諸公抵掌歎伏翌日受詔兼直書殿君蹈泳亨

衢翱翔近署誠衡遇物靡有低昂量陂虛受不聞澄撓
天球擅響雅鄭洞分水鑒忘情毛髮皆見為士林之主
表亦人倫之著蔡每太液波淥汾睢艸黃或御酒百壺
式陳鎬宴或卿雲五色垂示天章君必沾玉笋之醇醪
聯栢梁之高韻賜花奪錦肯讓景龍時人桂水空梁無
取南朝之體此外風規醞藉不雜塵游驅放玄虛善談
名理求之一時未易得也君屏跡勢利游心虛白踐赤
墀而登文石非所宴安拍洪崖而挹浮丘是其雅素且

以新安山水之奇秀江左人物之瑰瑋嚴助饜承明之
廬勞於侍從阮籍求東平之守樂其風土實奉俞詔歡
然愜心夙興戒徒星言行役噫錦帳綾被有中臺之禮
秩金匱牙籤有延閣之官次懸龜曳組建隼剖符驛吏
駕車而來迎縣令負弩而前引千騎駸駸而挾轂諸曹
冉冉而趨府載棨戟以先道露散冕以行春四十歲專
城而居雖盡美矣二千石與我共理厥惟勉旃行矣火
雲吐峰汗流激箭仙舟東下何翅一葉之輕旅鴈北徂

勿忘尺題之貺其他即朞月報政朝廷賞勞幸預代言之末願草陟明之詔云耳

送元道宗秀才序

昔夏侯勝有言曰士患經不明經苟明其取朱紫如俛拾地芥耳至乃抱荆山之璞猶聞待價操流波之引未偶知音蓋有淹速於其間夫子之所以罕言也河南元生出東南之美族稟山川之靈氣學術淵奧才思深婉雅善詞賦尤工詩什每扣虛課寂緣情體物必有警策

傳誦人口左氏之筆微為富豔相如之文長於形似翹
翹然秀出於場屋間矣有難弟焉有令子焉皆以俊才
著稱素風彌劬天倫敦睦庭訓嚴厲友于推讓士類多
之矧復內行修飭至性純孝閱市以資力學負米以潔
晨羞至於造請諸公不避寒暑博極羣書罔捨晝夜此
又勤即不匱艱而彌貞者已有若大丞相僕射東平公
鄧帥長城公皆坐鎮雅俗懸衡吾道嘉生之才美咸賦
詩以贈之此亦神物求之不可得也逮夫綸闈書殿三

臺內閣英髦雜集風鑑攸出見必倒屣坐多更僕接夷
甫之談柄知名理之斯在挹紫芝之眉宇覺鄙吝之都
忘當時名儒推獎如此而再試貢部敗於垂成盖云數
奇實非戰罪寄食輦下有索米之嗟薄遊關東無解榻
之遇歛起北堂之念遽賦南陔之吟與仲氏而言歸拜
慈親而為壽姑欲賣負郭之產扶安輿而來棄入關之
繻作焚舟之計決策素定戒途有期陸士衡之弟兄暫
還吳郡翟方進之母子同入京師行矣為我語姑蘇父

兄無或笑馮衍空歸輕蘇秦未遇以目皮相人作兒女
子見異時懷文二組駕駟馬車衣繡而過里閭揮金以
報故舊此際如下鄉亭長為德靡終洛陽妻嫂不敢仰
視徒厚顏耳明年春蟄戶震驚河流湍激當冀除敝廬
以俟子之西笑

送張泌之毗陵詩序

義興陽羨山水甲於江東張子巨源慨然發仁智之心
飄然有登臨之興葉舟東下蘭友與俱梁園雪飛汴流

日淺榜人宿戒祖席晨張於是京洛貴遊之賢鄉關布
素之執河梁惜別並愴離羣澤國贈行咸抽祕思風雅
之什爛然盈編又何必雜佩蕪金然後充乎巾橐也行
矣三吳之地素多賢豪十室之邑必有忠信雖君子在
位岩穴豈無於隱淪矧善人為邦閭里已臻於富庶儻
能為我擇爽塏營別墅當使夫陳力不能奉身而退受
一廛而為氓與萬物而共盡此所望于子也庶乎勉旃
獻歲發春遲子西笑

佛祖同參集序

昔如來于然燈佛所親蒙記蒞實無少法可得是號大覺能仁既而後智滋興悲心顯發念四生之沉溺輪迴六趣之中為一事之因緣出現五濁之世奈何根器各異機感有殊繇是開三乘權實之門設一時頓漸之教具偏圓半滿之義分悟證伏斷之差演之為十二部經廣之為百千萬頌隨類各解始雖自於一音達本忘言終乃同於二月故純陀未供之後鶴林示滅之辰以正

法眼付大迦葉內傳真印外授信衣作世導師為佛嫡
子凡二十七世至達摩大師哀此土之人昧即心之理
分別名相而不已類入海以筭沙攀緣生滅而為因但
認賊而作子聿來震旦宴坐少林不事語言不立文字
既得人而傳付乃趣寂以返真是為東方之初祖也自
爾本系相承旁支別出敷華結果五葉之識可徵續燄
分輝千燈之照彌廣至於出離生死一門證于涅槃誘
導愚迷萬行以之差別由二祖而下迄至于今以諸夏

之利根叶西土之懸記得道之者實繁有徒其或抵掌
盱衡乃了知於風力搖唇鼓舌即悟入于言樞或針芥
相投金鑰立辯或經塵將破啐啄同時示現方便以既
殊遭但因緣而亦異咸有軌迹著為筌蹄譬諸三藏之
文結集於鉢羅之窟七佛所說秘藏于娑竭之宮苟撰
述之無聞使後來而安仰先是諸方大士各立宗徒互
顯師承迭存語錄圭山惠其如是也會合衆說著為禪
詮融通諸家圓成一味蓋祖門之能事畢矣歷歲彌久

都序僅存百卷之文不傳於世東吳道原禪師者乃覺
場之龍象實人天之眼目慨然以為祖師法裔頗論次
之未詳草堂遺編亦嗣續之孔易乃駐錫輦轂依止王
臣購求亡逸載離寒暑自飲光尊者訖法眼之嗣因枝
振葉尋波討源乃至語句之對酬機緣之契合靡不包
舉無所漏脫孜孜纂集成二十卷理有未顯加東里潤
色之言詞或不安用春秋筆削之體或但存名號而蔑
有事迹者亦猶乎史記之闕文或無採歌頌附出編聯

者頗類夫載籍之廣記大矣哉禪師之用心蓋述而不
作者矣嗚呼法界無際衆生無邊凡厥有情莫非同體
終日圓覺觸目真如而迷失妙明增長虛妄分別影事
牽制於六塵積集苦因流浪於三有善知識愍其如是
也不歷事相直指本源但一念不生即三際俱斷十方
消殞諸聖現前識珠在衣匪從他得如金出礦豈復重
為圓頓之門妙如此矣稽所證之道然後知原師也生
如來家真法王子究所詮之理然後明斯集也了第一

義真最上乘當使末法之年初心之類去聖逾遠開卷
得解一彈指頃齊肩古佛不起于座入般涅槃雖利益
之若斯於滅度而無取即知施七寶而滿刹土徒為漏
業之資化二乘而等河沙適重敗根之罪師之法施豈
思議之所及哉新集既成咨予為序聊撫梗槩冠于篇
首云耳

諸公寄題建州浦城縣清河張君所居池亭詩
序

茂才清河君於予蓋鄉先生丈人行也頃者書軌未同
齒血猶壯不掃一室有志四方薄遊九江講學廬阜勵
精文史既素業之大成歸省庭闈值戒車之適駕未幾
青蓋西上先正從行喬木懷安族人攸庇亢宗裕蠱且
肥家之是圖委質策名於觀國而何暇雍熙二年仲氏
舉進士中乙科淳化三年季弟隨計偕列高等推讓致
美君之志也俄而先府君捐館壽陽犢車歸葬先夫人
啓手故里駒隙終喪商於解印而歸叔庭既冠而逝實

有天倫之戚無復西笑之心且欲沒齒田園放懷林壑
與浮丘把袂為羲皇上人其所居也背山臨水占奇據
勝累世增葺極為輪奐曲池皎鑒脩梁橫度虛閣崛起
反宇臨空雲山蔽虧魚鳥聲聒賞心肆體斯焉取斯予
淳化四年由書殿得告歸迎版輿時君膝下承顏友于
歡譙置酒危榭酣飲終日子亦斐然成詠題於梁屋及
咸平三年罷郡縉雲復造仙墅君且永懷罔極痛深終
鮮逝者如此靈光歸然予是用追感疇昔賡載前唱今

年君奉本郡計籍來上中臺蓋因縣次之續食將與故人而胥遇君之愛子實吾家之宅相而予之外弟也往年隨我肄業上都刻苦讀書三餘之習無廢孝謹成性萬石之德不衰君亦既見止彌加教督會稽括羽何用不臧于公里門於茲必大君戾止未久歸與興歎且以鄙夫昔留池閣二詠及羣公佳章俾之示朝右之賢庶乎知隱居之志安定大諫趙郡閣老及上邽富春晁陳諸紫微登秘閣潘公咸樂善無厭慕義不足競挾秘思

發為雅篇千里寄題豈人遐而室邇七閩傳誦蓋玉振以金相誠足為吾黨之美談寧獨光幽人之肥遯予與君先疇接吟雞犬相聞奕世聯姻絲羅有素早親長者之論脩知高世之行因叙始末用冠篇首云耳

送倚序

我之先由永嘉之難避地江外占數於上饒及劉展之寇又遷於閩粵治產殖貨以財雄於建安世為彊宗高上武力唐室之季亂離云瘼禮樂征伐不出本朝無種

而起為王侯稱兵而分據州郡故王氏奄有無諸六郡之地盤牙交錯莫非勍敵候望走集悉嚴兵備故我内外家世皆服縵胡而冠武弁總異師而提尺籍輜輶鼓吹盛於一方而羣從叔季憑藉世資習尚豪舉競養聲利爭為節俠唯玉山府君勞謙降志刻苦讀書好學之名聞於州里以孝廉射策委質江吳以儒雅從政仕至宰邑無何黃旗運盡琴堂秩滿考槃故里啓手歸全太常府君博涉藝文尤深左氏終鮮兄弟不遑充賦未及

中壽遘茲大禍家無擔石之蓄門無強近之親貌視諸
孤朝不謀夕我是時以一命為蘭臺正字尚未及志學
之歲遽罹憫凶將就死滅爾曹皆邕角稚齒俱未成人
田園污萊裘葛不具堂構頽替弓冶漸微既泣血終喪
即割慈遊宦艱難險阻備嘗之矣既而索米都下薄遊
外郡又三歲以文三十篇獻於公車始得為太常奉禮
且有中旨閱書於秘府日享公膳月受俸緡未能亢宗
財足餬口而太夫人與汝曹仰給薄產終歲食貧我又

智効一官相去萬里晨夕引領不覺涕之無從也我亦
進德礪行修詞聚學又得冊府秘書夙夜研習曾未期
月頗有文章出於人間為前輩所許又頻詣司馬門獻
賦頌天子益知名凡再歲間一召試內署一應制行在
得光祿丞賜進士第復受詔直集賢書院星律載周寵
光舉集稽古之力豈誣也哉得祿既豐思養彌切削牘
為奏賜告言歸自建安扶迎太夫人并挈汝曹盡室西
上僑寓輦轂殆茲歲星一周於天矣而我以不肖之質

中人之才黃屋過聽擢司雅誥敢不摩揣鉛鈍勵精夙
夜期有以潤色帝載與三代同風柰何力不逮心位過
其量歲祀逾久官謗囂然不能上封自劾幘被引退乃
猶束帶就列俛首取容碌碌於薦紳間亦顏之厚矣今
年汝舉進士有司薦名我時侍從穆清親逢旦暮天子
又賜汝高第自丙科而升乙科俄頃之間恩獎蕃縟汝
之仲兄及季弟比年來聖人誕生之辰延賞近侍並得
解褐試秩蓬丘每朔旦列拜膝下私門嘉慶歲時伏臘

捧觴上壽懷黃佩玉趨走左右固足以慰太夫人之心
而伯仲森列門無白丁亦足以為鄉曲之美談交遊之
光寵也今汝申天官調補掌簿四明期以來年往代其
任且將歸省松檟盤桓里閭俟春夏之交乃涖厥職汝
當念為士之道以仁義是務而閒宴不可忘為吏之方
以法令是師而資材不可強事上貴乎恭而慎於誦臨
下尚乎簡而懲其違至於淳素之風清白之訓蓋我之
家法耳豈復鄭重而言之哉若乃博約文史切磋道術

此又朋友之事也吾何與焉汝之歸吾黨之人有問於
我者為言受恩寢深泣官無狀如衛鶴之有祿位若社
鼯之載車馬悲愁憂畏不遑寧處幸天子一旦澄汰流
品考覈名實不能者止奉身而退固願返初服奉版輿
從諸鄉先生優游以卒歲也

武夷新集卷七

欽定四庫全書

武夷新集卷八

宋 楊億 撰

碑 二首

宋故樞密副使正奉大夫行給事中上柱國廣
平縣開國伯食邑八百戶食實封二伯戶賜
紫金魚袋贈尚書吏部侍郎宋公神道碑銘
并序

昔許穆公卒于師春秋重其死王事贈公衮以褒德岑

江陵薨于行天子嘉其盡臣節罷宵警以申恩皇上巡狩兩河駐蹕魏郡惟樞密副使宋公典掌機要務煩傷神得疾膏肓終於道路輟視朝於行闕申追命於泉扃痛深股肱見君臣之同體布在方策實今古之相望所以旌忠魂於九原鑠休光於百世者也公諱湜字持正其先廣平人也自微子歸周商丘啓國胙土命氏源深流長處荆蠻者才亞於騷人仕東漢者名叅於循吏或樹勲於代邸或馳譽於南朝枝葉扶疎華實蕃衍公之

遠祖占籍關中隱德未融重世始大曾王父澤登州牟
平令王父贊雍州萬年令皆以時命之數屈於州縣咸
有清白之訓遺於子孫烈考溫故晉天福中擢進士第
累遷右補闕文雅之譽流於京師骨鯁之風播在臺閣
及公之貴累贈工部尚書公即其次子也襟韻閒曠風
規爽邁凝脂點漆宛是神仙中人虛受蕪容居然廊廟
之器爰自髫髻卓然不羣了無童心靡雜兒戲初入小
學比及大成恣閱黃卷聖賢之言蔑聞青衿城闕之刺

既而究六經之微旨通百家之雜說服勤學問日引月
長刻意著述朝成暮傳跡在丘樊名振輦轂方隨鄉老
之薦適丁先君之憂藥棘傷生幾於滅性苴麻終制始
讓干祿太平興國五年春太宗凡三臨軒親選多士公
提筆就試思若湧泉煥乎成文曾不加點諸生方當於
燥吻一人已喜於同時賈勇先鳴拔乎其萃由是一上
登進士甲科解褐將作丞通判梓州權鹽院就拜太子
右贊善大夫歸朝改著作郎直史館中謝日賜緋衣銀

魚雍熙三年今工部尚書王公化基以諫官佐計相上
書北闕自薦其材太宗方求非常之人待以不次之位
謂宰相曰李沆宋湜皆佳士也可並試之即日召試制
誥於中書明日除右補闕知制誥與二公竝命焉當時
朝廷有得賢之議就轉庫部員外郎兼判尚書刑部面
賜金紫會有妖尼訴廷尉斷獄不平公職當詳讞未嘗
發摘坐是左遷均州團練副使公論惜之移汝州數月
徵拜禮部員外郎直昭文館復以職方員外郎掌誥命

踰年入翰林為學士轉兵部郎中知審刑院銀臺司封
駁事皇上嗣位真拜中書舍人修國史並兼內署之職
俄丁皇妣扶風縣太君淳于氏憂柴毀骨立杖而後起
五十而慕昔人所難七日絕漿僅成死孝纔卒哭詔起
復視草禁中公泣血抗章願終喪紀優詔敦勉不允其
請是年冬改給事中參貳機務明年契丹犯邊翠華時
邁樞機之任一二咨焉露版羽書實司其緩急伍符尺
籍專校於耗登乘保鄣險走集者稟於弛張發號令圖

方略者出於規畫乃至議將帥之能否授以指蹤揣蓄
人之情狀辯其狙詐折衝樽俎之際制勝帷幄之中料
敵若神謀事鮮過任重責大巧勞智憂而公與今襄陽
王丞相並掌其職公竭力盡瘁知無不為蒙犯風霜勤
勞夙夜陟降帝右咫尺天顏總領萬機便蕃三接焦心
極慮外疆中乾十二月癸酉上御武帳召近臣議邊事
公方指畫上前俄疾作仆於地若大醉狀不能知人同
列競前扶之上命中貴人扶掖以就西序亟令太醫切

脉且曰疾不可為也上憂形於色日夕候其安否明年正月乙酉乘輿與親至卧内存問公以所疾未愈懇乞先歸面可其奏且以御衾褥為賜仍命中使備肩舁什器帷帳湯藥飲膳送還京師既發又令近臣慰遣於郊外己丑次澶州憩於法寶寺是夕以不起聞享年五十有一上歎息久之詔贈吏部侍郎輟視朝一日命使者護送靈柩歸于上都緣葬所須並從官給公比及彌留且有治命曰上遇我厚必鹵簿葬我生無益於國死豈可

煩於人諸弟等表其緒言上深所嘉美詔以錢五十萬
絹五百匹米麥百石賜其家以備襄事即以其年十月
癸丑歸葬于京兆府長安縣義陽鄉大郭里從先尚書
之兆域禮也公娶清河張氏封本郡夫人婉孌柔嘉幽
閒令淑仁洽宗黨教成閨門二子長曰綸以延賞之恩
解褐太常寺太祝年甫七歲次佛奴尚在襁褓三女長
女適屯田員外郎楊坦其二皆幼公生孝謹之族負王
佐之才幼能屬文談必稽古尚書府君之捐館舍也季

父溫舒以左拾遺守華原郡公實從行府中牋奏皆令
代作公口占五吏應接不休日發百函親疎有意季父拊
背歎息曰真我家國器恨吾兄之不見也至性純孝出
人遠甚奉養慈母烝烝膝下調滫瀡以供膳衣文綵以
承顏左宦方州單車獨往盡留妻妾給侍庭闈杜門端
居曾不屑慮及太夫人寒暑邁疾膝理寢深公藥必先
嘗目不交睫禱神請代指景悼生雖魯閔之行無以過
也長兄泌職方員外郎越王府記室次兄澣皆先公而

逝弟湛任大理寺丞推以友愛成乎敦睦棠棣致美埳
麓相須天倫之歡士林聳慕耀州富平簿渙太子中允
沆處士澥進士洞殿中丞濤校書郎澹皆公之從父弟
也公承高門之慶為保家之主協比諸弟糾合近親人
不間言兒無常父宦成名立率由於公游吉之亢宗張
仲之孝友見於是矣公自決科筮仕黻纓登朝至如羊
舌胙習於春秋而公分直東觀裁成國史公孫揮善為
辭令而公入叅右掖發揮王言雋不疑之治獄也多所

平反而公當祥刑之任民以不寬山巨源之薦賢也密
陳啓事而公操審官之柄下無失職嚴安徐樂並在左
右而公步武禁林潤色帝載劉放孫資對掌機密而公
徊翔丹地秉執國鈞至於蹇蹇匪躬巖巖羣望外庭集
議不曲從而詭隨宣室論思必有犯而無隱此詩人所
稱邦之司直又如恂恂善誘拳拳好德博施以濟衆功
成不居虛已以待物事至而應此仲尼所云古之遺愛
雅性冲澹留心釋老早歲嘗受道錄晚節頗究禪筌悟

茲無生用成達觀素善持論酌之不竭多識典訓扣之
斯應挹量陂者鄙吝之意自泯窺眉宇者名利之念都
息接士在貴而思降定交彌久而益恭德邁種而愈勤
人服媚而無斃蹊成桃李夫又何言室有芝蘭但聞俱
化非大雅明哲豈能及是耶公方以將明之才輔文思
之政談弭兵之術議平戎之策使單于之首懸之橐街
潦陽之貢陳於宰旅致君堯舜為宋伊周而兩楹遘災
二豎為沴天不慙遺人之云亡召公深仁徒結甘棠之

愛留侯素志莫遂赤松之遊藐是諸孤庶乎有後常所
著述遺札頗多自掌命書尤振時譽累當大手筆之事
皆為士君子所伏集二十卷傳之子孫諸弟等以總帳
猶懸宿草將列憂陵谷之或變慮德音之不昭謀建豐
碑以表神道以某嘗學舊史曾接生平得以祖述世家
論次閎閎叙太丘之德諒無媿詞非臧孫之言敢期不
朽聊撫梗槩以為之銘銘曰

大德淳耀文明誕敷鳳鳥斯至神龜負圖時惟宋公矯

翼雲衢五百之運其在茲乎黃離繼明百度思治旰
臨朝齋居決事時惟宋公將順其美咸平之政既盡善
矣八柱承天七聖翊軒彌綸袞職斟酌化源青蒲伏奏
溫樹無言林父忠蓋康侯錫蕃三邊屢聳六龍順動借
筋前籌屬鞭景從美疾弗瘳吾謀猶用城郢遺言涉洹
占夢梁木斯壞太素收神易簣而沒委順全真精爽何
託上騎星辰如可贖兮人百其身行路咨嗟晁旒悽惻
股肱或虧其痛何極尸諫猶切忠魂彌激臨死之言不

忘社稷卜葬咸陽著蔡弗違封樹云畢閔茲音徽自
古有死吾將疇依逝者可作非公曷歸丘壟陵夷光陰
迅駛傳信方來孰非文字乃刊貞珉式表幽隧懷公之
人於斯墮泪

重修亳州洞霄宮碑銘

并序奉
勅撰

臣聞昔者大道之行異人間出洪惟柱史實暢真宗叙
道德之二篇述慈儉之三寶玩志衆妙理洞於帝先垂
訓方來尊居於教父故尹喜望氣爰識真人史遷編年

首推黃老或謂之隱君子著書五千文或以為太史儋
享壽二百歲立言垂于不朽乘化入于無間惟苦縣厲
鄉即降神之地土風雜乎南楚郡境介於陳留蓋尸而
祝之岷嶴作庚桑之社思且愛矣陝郊存召伯之棠後
人緬慕玄風周爰舊壤聿因靈迹肇建嚴祠歷代封崇
樵蘇之禁彌肅昔賢讚述金石之刻具存又往者聖賢
誕祥元符冥合乘白鹿而下爰自九天感流星之精生
于左腋指李樹以為姓由聃耳而立名稟粹斗魁發祥

井脉食以為塗山祀夏式脩啓母之祠后稷配天乃建
姜嫄之廟恭惟聖母實育至人陵谷未移光靈如在又
因遺址別啓殊庭目之為李母祠盖有年矣雖潔淥致
享不領天子之祠官而間館棲神具載職方之地志歲
月寢遠遺構僅存期運環周祥符顯發施及唐室系自
仙源乾封中以錫羨流光肇開鴻緒似續蕃衍襲慶本
支且念太極之先冠二儀而首出盛德之後垂百世以
彌昌追從長樂之名用顯始基之迹繇是追封聖母為

先天太后又以列真之宇神光燭于官壇集靈之虛紫
氣干霄極琳房絳闕窈窕重深孔蓋翠於裴回房止
蓋方輿之福地乃虛皇之密都由是改命祠宇為洞霄
宮香火無廢於熏修棟宇益增于輪奐南望吾子飛觀
凌雲左帶靈溪清流漱石行人胥畏頗類仙臺遊者忘歸
更疑秦洞至乃玄貺昭格冥感彰聞或旭景朝躋非煙
絢綵或柔條夕勁甘露垂滋或千仞鳳翔覽德輝而下
集或九井龍見乘雲氣以上騰往昔海縣塵飛萑蒲蟻

聚流矢集屋束蘊乘墉即必黑氣塞川愁霖貫序兇黨
不能肆毒闔境率以寧居當時降璽書以旌揚垂方策
而標紀求諸故府蓋圖牒之未刊歸然靈光實神明之
所庇皇朝接千歲之統按九州之圖包舉海隅並走羣
望講求祀典咸秩無文誕揚清淨之風式契玄元之旨
深詔譙郡崇奉靈場繕完靡虧焚脩彌潔崇文廣武聖
明仁孝皇帝之在宥天下也恭默思道齋栗事神紹祖
宗之耿光集乾坤之景命端拱南面唯軫念于蒼生間

宴西清乃娛情于玄牝順風之拜幾慕于崆峒赤水之
珍靡徵于謨詒毆民壽域日用而不知決事齋居天行
而彌健乃至探求三五之載籍致恭上下之神祇恭稷
犧牲悉用先王之禮壇場珪幣無取方士之言正遠治
煩修弊起廢陳信策告蔑聞秘祝之官備物薦嘗奚餒
若教之鬼乃至山川作鎮于地出雲雨以嘉生卿士有
益于人垂竹帛而悠久莫不咨詢典故彌縫闕滙豐潔
苾芬而致用聰明正直之是依用能陟降泰時與三靈

交歡端委明堂俾諸神受祀帝錫純嘏百祿是膺洛出
圖書九疇式叙盛德大業光表格天固非名言之所能
及也乃眷亳社時惟穀陽仁里未遷清都斯在曩以神
虬躍于沮澤陰魄離于罕車雩禱偶愆水潦荐降雲不
待族雨及我私甫田或害于梁盛樊圃幾勤于浸灌是
宮也雖面勢爽塏取規大壯在山梁藻枕于焉勝人非
麥麴鞠窮何以禦濕屋瓦斯漏梁木其摧本郡以聞當
陽太息即日降明詔遣近臣案行故墟周視層構度費

制用庀徒僇工之子于垣百堵皆作靈臺經始不日而
成雲鍾募農隙之民風斤得藝成之匠朱扉洞呀于廣
陌紺殿崛起于中天棟桷交持見陰虬之騰倚觚稜四
注狀名輦之翰飛繪素彰施模睟容而克肖吉蠲享獻
表明德之惟馨空歌洞章蕭寥乎旦暮颺輪歛駕出入
於虛無固以昭戩穀于聖神夸壯麗于方國契宸心於
妙有躋氓俗于無何行將追七十二君告成功于日觀
享萬八千歲比聖歷于天皇玄同至真永錫難老如斯

而已矣秋八月新宮成主者上言願志能事大君有命
允屬下臣臣學古非優聞道素淺草寬大之詔無東里
潤色之才談惚恍之宗增吾黨狂簡之媿踴躍燥吻謹
為之銘其辭曰

至哉玄元權輿太極象帝之先昧者奚覲矯矯伯陽自
天生德其道猶龍人靡能測厥初誕祥時惟厲鄉領垂
縞髮室炤神光蹈十把五舌舐而長井泉湧脉星精耀
芒集靈之址玄祠崛起檜亦手植樹魯親指聖母遺阡

右環渦水福地旁連清都對峙瓜瓞其昌錫美于唐寶
冊追謚雲篆龍章金闕易號丹臺絳房明靈如存祀典
不忘帝臨赤縣乘正御辯致恭神祇大庇黎獻德馨流
聞治毛登薦鬼有所歸民亦不倦帝居紫宸味道全真
格天在宥易俗還淳陰陽大順闕石和鈞亮采時叙輝
光日新乃眷東顧欽崇教父定之方中增修祠宇間館
相望飛輶攸駐日蒲星回池平樹古申命中人王言如
綸鳩工底法即舊謀新三時之隙百日之勤恍若神化

以棲靈真瞰鮮原兮靡迤面皇州兮密邇氣翁蔚兮上
騰波齋淪兮東委唯列仙之殊庭干青霄兮特起竦金
閭兮崔嵬薦蘭蒸兮裊回緘紫籙兮難見秘靈符兮不
開伊九天之神母御瓊輪兮下來祝聖人兮富壽延寶
歷兮京垓又何必迎年之館兮通天之臺

表一首

故信州玉山令府君神道表

玉山府君以太平興國三年六月三十日啓手足于長

樂里之第其年十二月八日歸葬于南原凡二十三年
矣金石未刻陵谷將變嗣孫億大懼夫祖德之墜于地
考于譜牒詢于耆父追述先美以表幽壠云府君諱文
逸字慕賢華陰洪農人也昔周之伯僑始啓封邑胙土
命氏實曰楊侯瓜瓞蟬聯大昌厥緒在西漢時重侯累
相施及魏晉世為公卿永嘉之亂播遷江表始占籍于
上饒郡因為郡人焉安土重遷凡十餘世唐上元中劉
展稱亂吳會弗寧府君之六代祖始挈其族人避地于

建安之吳興斬木誅茅築室治產以財力雄于州里以
義方訓于子孫魯王父式蹈德詠仁隱居求志王父部
屬唐季倣擾干戈日尋奕世聚居羣從百口非用武斷
不能亢宗於是募鄉民之拳勇者數百人受署于本郡
為義軍指揮使堅壁要害以備不虞一邑賴之終以無
患烈考弼遭時未久結髮從軍受署義軍討擊副使府
君即副使之次子也始在童丱遨遊膠庠博習親師服
膺素業家世從戎旅之事以豪舉聞于郡中而府君恥

事輕肥雅好學問被服造次必于儒者識者以為秦董
父之生丕茲也時王氏偏霸閩隅府君世父太常君實
為邑令以猶子之愛推延賞之典纔十餘歲解褐試秘
書省校書郎未幾丁副使君之憂泣血執喪殆于滅性
純孝之德鄉黨稱焉及王氏乖離吳人致討建安失守
歸于金陵改右千牛衛曹叅軍知建州倉事克遂循
陔之歡靡辭掌庾之賤就加本衛騎曹叅軍先夫人寢
疾彌留府君即解所職調品藥餌供視膳羞目不交睫

衣不解帶如是者凡歷三時而卒以不起府君勺飲不入嘔血數升柴毀支離僅成死孝服除調補撫州南豐簿視事踰月化行若神先是邑人常以端午為競渡之戲具舟數十艘聚羣不逞之徒以較勝負必先載瓦石因以相擊每歲死傷者數十百人府君前知其然至期大索笞其為首者數輩訖事無變獄訟衰少縣政益清秩滿擬常州武進丞辭不之任改大理評事信州玉山令邑有鎮兵兼總軍政府君寬以御下明以炤姦流亡

悉歸版圖增羨先甲發令卒乘畏威泮林革音寇盜屏
跡境內大治政聲流聞就加大理司直示陟明也未幾
王師渡江臺城蔽壘調發徵歛繁于秋荼府君寅奉簡
書事不愆素魯未數月得代而歸老幼攀轅易服宵遁
當是時也國命將墜人謀已改府君杜門稱疾不交世
務靜以觀變默而俟時俄而黃旗運終青蓋西上詔旨
敦迫州司臨門方促星火之期忽嬰霜露之疾不克上
道因以家居惡石無徵梁木斯壞享年六十有五未躋

于壽歷試百里之宰未盡其才有折衝制勝之略值艱
虞而不得伸有化民成俗之具逢承平而不及用齎志
沒地遺恨終天行道之人所共歎息府君娶武寧章氏
駕部郎中嵩之女也生先君諱某象賢惟肖稟訓無違
宦學四方名聲籍甚及府君歸老別墅先君終鮮弟兄
烝烝就養不離左右被褐懷玉韜光戢曜以至下荼蓼
之苦荷清白之謀世故紛綸家徒窘絕未遑射策奄茲
淪逝後府君九年而終咸平二年十一月天子有事南

郊其孤僊任諫官有司以丙戌詔書追贈先君為大理
評事寵被泉壤慶延里閭行路歎息父老榮之四女長
適隴西李瓊次適清河張仲言後府君七年而逝次適
河間俞簡成次適清河張彛率皆大族莫非令人婦
德嬪風表儀宗黨府君之任玉山也其孫僊始生僊將
生之夕府君前得吉夢謂必興吾門躬自撫養特所鍾
愛纔免襁褓教以詩書及府君之捐館舍僊五歲矣方
在孩抱未遑慈顏逮十有一歲太宗皇帝遂聞其名徵

詣闕下試以詞賦官于秘書自是入蓬丘直仙殿升近
署寘周行為天子從官成國家大典非錫羨餘慶燕翼
貽謀天啓畢萬之大名世祚于公之陰德不然者最爾
億何以及茲億自舉族還都再見閏月歎墓木之已拱
憂堂構之將頽前年獻封公車求領郡政皇上固留不
遣億懇請而行甌粵之區封畛相錯伏念昔者府君之
歸窀穸也銘志闕如歲月寢深耆舊猶在遂用採撫以
備萬一謹按府君天姿謹厚寬中多恕行有枝葉心無

町畦慷慨經綸博通治體信著朋友仁洽閨門勝冠之
年殆事祖母被疾沈痼經時伏枕府君束帶奉侍夙夜
匪懈嘗惡澣洗無所不為府君母弟五人率以豪俠自
任鮮車怒馬輕裘緩帶出入閭里持吏短長暴虎憑河
使酒難近私匿亡命結客報仇人胥畏之莫敢忤視府
君戒督備至夏楚是用諸弟惕息剛悍少衰皆以天年
死于牖下議者許府君之善教也涉獵史傳詳明典故
銳意風雅動成篇章及試吏方州嘗奏伎記室巧為書

檄曲暢事情兵戈之餘遺豪散落素善草隸自可名
家天縱多能洞曉鍾律新聲度曲精義入神圖緯數術
罔不研覈恭陸蒲塞出于餘力若乃張仲之孝友安世之
慎密史魚之直伯夷之清甯俞之忠石奮之謹劉文饒
之恕秦巴西之仁庾亮之風流山濤之識度凡是衆美
無一闕焉時方構屯位不充量蓋仲尼云如有用我者
其為東周乎漢文謂李廣惜不當高祖世萬戶侯豈足
道哉命之通塞道之行否固有冥數矣夫惟賢者能論

譏其先祖之美而明著之于後世者也無美而稱之是
誣有善而弗知不明知而弗傳不仁三者君子之所恥
也恭惟府君之德業章章如是國史弗載鼎銘未刊春
初秋嘗彌用怵惕冬裘夏葛靡敢遑寧嗚呼不見成人
范喬之悲罔極有慙于長太丘之德未衰爰勒貞珉以
永終古盼蠻非遠聲欬如聞嗣孫之勤尚或臨鑒云耳

碣二首

故隴西彭君墓碣銘并序

碑碣之制著于令甲咸以官品而有等威至于孝義著聞隱淪不仕亦許刊石表行以示後人斯國朝之彞典也隴西彭君諱悅字仲荀予同郡人其先屬玄王之勤商與豕韋而更霸保姓受氏德厚流光乃至鏗為大夫以耄老而著稱宣為三公由經術而進用錫羨蕃衍垂裕後昆枝葉扶疎譜牒散落至君之七代祖始占籍建安因以土著奕世似續孝謹不衰有蘇秦二頃之田得猗頓五特之術治產殖貨貲擬王公大王父英屬王氏

建邦亟登勇爵實貞師律式遏外虞受署御史中丞本
鎮防遏使王父晏為之副貳以壯戎麾烈考大規值金
陵用師閩隅瓦解遂忘懷物表脫跡世紛樂一丘之棲
遲詠幽人之長往及天地開泰車書混同華黍盈疇素
髮垂領鼓腹含哺為太平之民君特達不羈旁通多可
跌宕文史慷慨經綸立義不侵好為然諾之信捐生赴
難靡以在亡為辭睦族以仁事親以禮勤接士類賓至
如歸教行閨門衣無常主脫驂周急斯乃細行折券市

義固其素蓄汝南之俗咸出子將之評潁川之人懼為
陳君所短一境從化或行者之讓塗千里請交多升堂
而拜毋窺義府者不見岸谷飲德馨者有如椒蘭仲尼
所謂君子儒者此之謂矣始以肄業之故自鄉里杖策
游尋陽之廬山勵精為學纔暮歲之內以詞賦擅名同
時輩流亦所推尚未遑鄉老之薦屬有樓船之師歸省
庭闈甘心畎畝年甫壯室尚丘園而考槃爵非公乘與
令丞而亢禮頗為州縣之敦迫遂與計吏而偕西裹足

戒途推鋒戰藝凡兩就于貢部皆不利于春官敗于垂
成終以旅退豈時命之未會將地勢之使然耶拂衣言
歸歛迹肥遯以為自足于已何必陳力于周行獨善其
身安事儻來之外物由是調甘滑脩澹之味以潔膳羞
督畋漁耕鑿之業以豐生產法周禮而闢庠序以教子
弟慕鄭莊之置驛馬以待賓客無營無欲優哉游哉如
是者歲星一周于天矣遁丁烈考之憂君天性純孝居
喪過禮柴毀骨立觸地無容果以藥棘之傷生不逮苴

麻之終制去年夏以先君窀穸之事市葬器于上饒之鉛山跋履山川蒙犯霧露得疾逆旅肩舁而歸反席未安瞑目長往年四十九即以其年五月十二日從先君之喪歸葬于新豐鄉王殿源靈際山祔于兆域之側禮也夫人武寧章氏故汀州歸化令士廉之女也雅有婦德宜其室家前君而亡墳未宿草嗣子歆承詩禮之訓挺岐嶷之姿未及勝冠之年已負肯堂之志趣向遠大意行瑰琦所謂謝庭之芝蘭當為周廟之瑚璉驥子絕

足未易可量唯君蹈德體仁秉彛居簡量陂萬頃莫測
其涯宮牆數仞孰窺其奧言行相顧磨涅靡渝誠明內
融應接無滯而不登一命不沾寸祿蓋日車亭午或覆
盆之有遺脂網橫流亦吞舟之斯漏然方朔殊少于自
薦而澹臺頗失于不言空遘盛時莫躋仕路茲士友之
所共歎惜也然施于有政是亦為政又何必社稷人民
始為行道不患無位患所以立又何必軒冕爵位乃曰
成名嗚呼彭君亦可以為達矣予與君有桑梓之舊連

瓜葛之姻顧惟忘年之交實辱同聲之分嘗念淳化中
自書殿歸寧榜小舟游武夷山道出君之舍下君率族
人携酒餉俟我于江干班荆藉草引滿舉白半酣耳熱
迭舞相属且為十日之飲飽聞同心之言自茲分飛三
見閏月歲不我與逝者如斯其孤泣血奉書乞文表墓
感故人之疇昔嘉孝子之勤拳莫漬酒以伸衷空含毫
而叙美銘曰

移孝為忠乃可從政自家刑國亦以觀行猗歟彭君舍

華不競嗃嗃閨門說說子姓睦族親仁讓夷急病進以
干祿退而知命萬石孝謹出于天性太丘家風宜書甲
令良玉蘊璞岩谷增輝矰弋徒設冥鴻已飛隱居求志
色養無違鄉黨胥化閨門已肥王戎死孝銜哀不飢公
明短折異代同歸泉臺永閔草露空晞刻茲圭石以志
音徽

劉氏太夫人天水縣太君趙氏墓碣銘

并序

咸平中詔以秘書丞直集賢院劉君隲同修起居注實

執素臣之筆入踐赤墀之塗侍從穆清親逢旦暮出扈
詔蹕入宿周廬為儒之榮舉無與比時君奉太夫人就
養于京師夕膳晨羞既馨而潔出告反面式燕以寧諸
孫在旁冢婦佐餽詵詵有後啓于公之高門蒸蒸承顏
奉魯侯之壽母措紳欽羨人倫聳慕屬天子兩郊吉土
推恩百執湯沐之典時庸顯親詔封夫人成紀縣太君
又徙天水恭惟疏邑之典用旌斷几之訓徵名數于石
竊報勛勞于棘心人子之道斯為至矣而夫人從子之

貴去國長懷當一喜一懼之年動維桑與梓之念君由
是奉公車之奏牘求會稽之郡章天子俞之即命領衡
陽郡事前席宣室從容話言賜金內府光寵行邁且以
君出入交戟多歷年所筆削汗簡克謹官業又自曲臺
博士遷尚書外郎以坐曹應宿之重領案部行春之寄
衣色五綵雜蒨綬以相鮮車朱兩轡先版輿而奉引帳
飲別墅上壽高堂合戚屬以叙燕私道舊故而為笑樂
揮金告竭家忘其貧常膳載加喜形于色嗚呼不幸夫

人以景德二年正月己未終于郡廨之正寢享年八十有六卽以其年丁丑歸葬于潭州長沙縣長沙鄉祔于太博府君之塋禮也夫人其先京兆人家世儒素父拯終澧州慈利令妣滎陽鄭氏故連州刺史堯庭之女夫人既笄歸于劉氏實澧州錄事參軍累贈太常博士諱延字字贊明也博士君肯構其家以儒為業讀易得伏羲之旨詠詩有騷人之風振跡丘園試吏州縣實有仁惠在于閭閻凡歷五官終以無過夫人輔佐君子宜其

室家及茹痛未亡靡它誓志諸孤藐若四壁蕭然夫人躬機杼以給伏臘男且就學擇鄰居以示訓女將適人結衿褊以申戒鞠育勤苦越十五年而工部從賦鄉書策名仕籍稽古幹事為時聞人蓋劉氏之族繫夫人而立也夫人雅性奉佛深通內典女工之暇唯誦金言寡居已來殆廢膏沐治家以正教子以嚴御下以仁奉身以儉用能閭閻範式是六姻壽考康寧享茲五福迹其雅素豈徒然哉一女適魯國魯弼舉進士終殿中

丞工部三子曰直方舉進士任大理寺丞潭州通判曰直
溫直清並業進士二女長適會稽夏渙舉進士得大理
評事知鄂嘉魚縣次適譙國夏侯藏用亦進士内外姻
戚莫匪文儒一門之中素風特盛積善之後餘慶巨量
工部君履霜露以涕洟奉几筵而樂棘五十而慕出于
至性三年之制善守禮經且以封樹克終歲月增逝大
懼徽懿闇而不彰遠咨遊舊文以為託書郵絡繹玉音
荐委褒陶母之德誠媿春秋之徒表京兆之阡式謹樵

蘇之禁銘曰

嫵婉之德宗姻是式表南國兮
嘒嘒閨門繩繩子孫昌
後昆兮脂田換縣蘭陔潔膳
壽觴薦兮某衣斑斑冢婦
執筭慶承顏兮融峰峻極湘
波碧色啓封域兮報德昊
天勒銘新阡垂億年兮



武夷新集卷八

欽定四庫全書

集部

武夷新集卷十九

詳校官監察御史_臣李陽楓

檢討_臣何思鈞覆勘

總校官中書_臣朱 鈐

校對官中書_臣葉 炎

謄錄貢生_臣左熙世

欽定四庫全書

武夷新集卷九

宋 楊億 撰

墓誌一首

故宋陝州芮城令清河張君墓誌銘

君諱仲仁字子信其先清河人後徙建安之吳興遂為
著姓當王氏之據有閩越也曾祖從晟為州里豪右材
無文武仕至蒲城制置副使工部尚書祖贇以賞延之
典署建州長史烈考仁邈檢校左散騎常侍君即常侍

之次子也與伯氏同生居上為弟風格甚類趣向多同里巷相疑家人莫辨每異其服飾以自別焉君爰自童蒙服膺儒素韻宇冲粹智畧縱橫李氏之平建安也常侍辭疾家居累徵不起君策杖行在叩關上書朝論竒之即授太常寺奉禮郎改秘書省校書郎調補本州松溪尉江表平入朝歷衛州衛縣主簿青州千乘尉達州巴渠簿兼令尉事遷陝州芮城令以疾去官旅寓京師尋訪醫藥積日彌久美疾愈滋肩昇而歸遂成沈痼清

漳卧病既十年而未瘳東岱歛魂俄三號而不返以咸
平三年六月十八日卒于仁風里之私第享年六十二
其年某月日歸葬于裏衝源順也君娶武寧章氏生子
三人長為舟舉進士次垂象早亡次為式女一人適進
士章覃自君之被疾也為舟等夙夜扶持躬親左右靡
神不禱靡藥不嘗蒸蒸服勤目為至孝予從祖兵部即
君之元舅君之先夫人實予之尊姑予之與君猶丈人
行也平生游處顧託乘以猶新舊館過從嗟脫驂之無

益謹銘翠琰以志佳城銘曰

天之德兮世濟美仕兩朝兮宰百里政之善兮疾何美
禱之久兮藥勿喜返九幽兮隣萬鬼人之生兮胡至此

宋故主客員外郎直集賢院高平范公墓誌

銘

咸平五年二月戊寅集賢學士主客員外郎高平范公
恭中風眩終于上都甘泉坊之私第上以賢相之後形
于歎息戚里之懿優其賵賻兩宮遣使以赴弔四隣聞

喪而輟舂交遊慟哭于寢門行旅客嗟于閭巷非椒蘭
之德服媚于人梁棟之材中道而夭者疇能痛惜如是
哉公諱貽孫字餘慶濟南歷城人其先歷虞夏商周實
享世祿春秋戰國繼出名卿或以博士顯東京或以詞
人稱南國或以文雄史策或以信著友朋蕃衍流光非
可殫舉及公之大父守愚占數京輔隨牒方州為鄭州
防禦判官命屈當時慶鍾後嗣累贈太子太師王父故
魯國公諱質以伊管事業輔翊三朝以燕許手筆稱量

天下由司徒侍中罷為太子太傅魯國公而聞望益大
恩禮彌渥將為蒼生而再起遽歎哲人之云亡然自五
代以來百年之內號良弼者不聞它人累贈至尚書令
烈考諱旻以公卿子著籍甚之稱在貴遊間有台輔之
望文章組繡于擊輓心計剖析于毫釐任給事中三司
副使公累謫宦事備國書由公上言追復官爵累贈至
工部尚書公以岐嶷之姿荷清白之訓思以學優入仕
恥由父任為郎不雜塵遊專精墳史果以鄉里之薦亟

預賢能之書天子臨軒擢居乙等同年生率次補州郡
從事掾屬丞尉天子以公奕世載德肯構象賢欲其起
家不循常調解褐授大理評事雍熙中林胡犯邊王師
致討飛輓之役公實董之祇畏簡書大足兵食凱旋遷
光祿寺丞數月改秘書省著作佐郎面賜五品服公以
羣玉上帝之冊府蓬萊道家之藏室賢俊咸集喜田蘇
之與遊圖史實繁多黃香之未見于是削章退食獻賦
離宮即日命公待制文館數月以本官直集賢院自是

細書石室侍宴瑤池歌黃鵠于建章必陪賡載泛樓船
於汾水即奉豫遊以冠王之英標屢聞題柱以燃萁之
敏思幾至奪袍其風度閑詳才調清婉士流推慕時論
歸之登朝為殿中丞遷太常博士上即位入省為外郎
皆領書殿之職公克纂緒業祇荷門閥寢丘遺產非有
膏腴晏子舊居未更奩塏而能孝以睦族儉以飭躬即
安先人之廬不違王父之命雅好禮法尤重名節奉烝
嘗之祀馨德達于神明事暮功之親歡心洽于宗黨性

嗜羣籍家藏萬卷或手自繕寫或親加校讐紺素畢陳
敵秘書之副本籤題具列同吳氏之西齋好事之名流
布京輶每風庭月榭蕭辰蘭夕必命儔嘯侶銜杯漱醪
凡備三益之友莫匪一時之雋漢庭太史或奏于聚星
齊國客卿無嫌於卜夜此亦冲襟高韻賈越常倫尚德
好賢有足多者嗚呼不幸今也其亡享年四十三斯天
也已矣夫人高邑縣君李氏實淮陽丞相之妹洪惟伯
姊母儀萬邦作合先朝居尊長樂而夫人處貴思降在

富能貧周旋禮經輔佐君子得中饋之道彰內助之賢
舉案齊眉方期于偕老帷堂晝哭遽痛于未亡一子克
勤年十一歲天子憫之特授太常寺奉禮郎月給俸緡
俾終服紀固有奇骨荷茲高門雖在童蒙已知孺慕有
後之慶斯言不誣一女尚幼夫人以喪無慮居禮當即
遠毀家襄事竭力送終伊洛之間松檟斯在日月其吉
龜筮無違即以其年十一月戊申扶護歸葬于河南府
洛陽縣某鄉某里祔于先塋側也嗚呼劫燼灰飛沉碑

谷變非刻金石曷志桑田以某投分生平託之銘篆巨
源尚在庶嵒紹之不孤伯喈有言述太丘而無媿銘曰
范氏之先出於陶唐積德儲祉奕葉流光赫赫魯公蟬
綏貂璫陰德有後乃生夕郎於惟集仙肯構肯堂穆然
容輝煥乎文章行歸于周動罔不臧嗚呼難忱今也即
亡洛水濱兮却山址波東傾兮樹西靡從先公兮夜臺
啓新阡兮蒿里傳三世兮一身閔九泉兮萬祀琢貞石
兮志佳城人之生兮胡至此

宋故推誠保德翊戴功臣鄧州管内觀察使金
紫光祿大夫檢校司空兼御史大夫上柱國
長城郡開國公食邑二千四百戶食實封四
百戶贈戶部尚書錢公墓誌銘

咸平六年秋七月詔鄧州觀察使并代等州經略使長
城公歸京師疾故也上開宣室御武帳延登前席勞問
數四以公美疢初復未任朝謁賜告就第俾之順養汜
九月勿藥有喜入謁未央宮自是五鼓登車晨趨無廢

三杯退食常膳載加朝野之人室家相慶喜良臣之獲
祐而斯文之未喪也十月戊寅宿戒知友會竺乾之宇
為桑門之饌與聞士輩談苦空讚真諦俄起更衣偃然
就枕若假寐焉少頃視之乃風眩暴作如大醉狀肩舁
歸第是夕以不起聞享年四十有四上臨軒震悼遣使
弔問法賻之數有加常等窀穸之事悉從官給翌日詔
贈戶部尚書天子以公母夫人在喜懼之年有羸老之
疾不克終堂之養實深擠壑之痛特命中貴人面賜白

金三十斤禮極哀榮恩霑存歿君臣之際斯為至矣公諱若水字淡成河南新安人蓋凌烟功臣巢國公九隴之後世胄閱譜牒存焉贈太子太保萼追封瑯邪郡太夫人王氏曾祖妣也贈太子太傅柔追封清河郡太夫人丁氏祖妣也尚書司門員外郎贈太子太師文敏烈考也往者公叅掌萬機追榮三代始贈孤卿再躋極品至于延鄉之命乃慰令伯之心蓋由夫錫羨貽謀重世始大臧孫于焉有後太丘以之無慙者也公始在孩

稚穎悟不羣爰自青衿即齒鄉校開卷成誦發言有章
纔十歲能屬文逮志學之年已博涉六藝方領矩步比
肩諸生而符采超邁襟懷散朗山庭月角蓋有公侯之
相瓊樹瑤林自是風塵外物華山陳搏一見公以為有
仙風道骨名在丹臺紫府中柏閣僧宗裔者有人倫之
鑒獨識公于儕輩且云斯人者異日登金門上玉堂升
赤霄捧白日矣太平興國七年詔郡國貢士河南太守
以公首薦于賢能之書時纔弱冠會有期功之喪不克

隨計再上登甲科解褐同州觀察推官專以經術緣飾
吏事至有鄰郡之民滯訟未決不遠千里來求片言時
先太師掌內帑于西都倉卒捐館公見星而往指景悼
生泣血倚廬柴毀骨立左馮之人相與列狀太守且云
失賢從事民將疇依升聞于天特俾權奪公墨縑而贊
幕畫心喪以畢禮經郡政倚成昨頌尤塞今三司使夏
官侍郎上谷公時任樞密學士領選部方與天子論思
帷幄之中進退天下之士而品藻人物講求茂異孜孜

慰薦唯恐不及當是時公及太原王扶穎川陳充同郡
錢熙皆為外諸侯賓屬即抗章以聞咸傳召歸闕天子
命丞相府召試以公文最高超拜秘書丞直史館中謝
日面賜緋衣銀魚自扶而下只除殿中丞不得與公比
明年拜右正言知制誥與今給事中柴公成務呂公祐
之諫議馮公起叅知政事王公旦同制並命焉淳化三
年郡國貢士凡二萬人貢舉已來莫斯為盛天子詔公
同掌文柄數月又命案行平涼五原等郡公乘驛至塞

下盡得其利病歸奏於青規中畫地聚米如指諸掌天子嘉歎且諭以登用之意公辭以身被逢掖業在黃卷得司誥命為詞臣足矣天子乃召公入翰林為學士自屯田員外郎遷職方仍賜三品服審官辯論人材周太宰之任銀臺出納王命漢尚書之職又詔公兼總二司焉至道元年春正月命公為右諫議大夫同知樞密院事進階朝散賜勲柱國樞衡之任機務在焉自唐朝以來皆二廣兼領逮朱梁之後與三事抗衡至若赤白之

囊曉傳邊奏輜軒之使夕發兵符承密旨于禁中授成
筭于閫外丞相有所不聞也天子以公忠肅明允溫恭
篤慎付以是任一二咨之未幾太宗上仙聖皇紹統擢
拜金紫光祿大夫尚書工部侍郎進封長城郡侯策勲
上柱國餘如故上以公顧命大臣股肱良弼虛懷延納
垂拱仰成公亦夙夜在公憔悴事國小大之務思竭其
力而致其身謨猷之言必沃乎心而逆乎耳穆清體貌
曾靡違顏私庭休沐不遑調膳一日乘清閒之宴面陳

至誠直以聖朝之日長高堂之齒暮願得綵衣膝下以奉其歡心上敦諭再三不俞其請公兩奉奏牘確乎不拔上將欲崇進其秩公頓首固辭即以本官罷機務充集賢院學士判院事俄受詔修永熙國書公即引給事中柴公成務侍御史南陽宗度秘閣校理濮陽吳淑及億亦在選中曾未暮年書成奏御既終乙夜之覽爰備名山之藏上又以太祖皇帝十七年中經營四方削平海內規模宏遠功德茂盛當時史臣殊為簡略又命公

舉爾所知再加論次公辭不獲免乃奏故刑部郎中知制誥王公禹偁今翰林學士梁公顥知制誥李公宗諤趙公安仁纔及周星俄已絕筆彌縫闕漏號為詳備兩朝大典出于公手百代而下垂為信書俄掌吏部三銓兼秋曹案讞會鳴鏑入寇大輅親征公扈從鈞陳駐蹕全魏或燿火傳警羽檄交馳天驕舉南牧之師雲臺有未決之議上必遣親近咨其計策給以筆札受其條對六羸宵遯萬乘天旋命公權開封府事鄴都缺帥北顧

是憂命公知天雄軍府兼兵馬部署言事者以上郡之地控扼黨項宜修復城隍大聚兵穀朝廷惑之發卒萬人贏糧深入因舉夫版築之役而謀夫盈庭利害蜂起上未能決適公自魏乘驛會師于離石以幄幕九張兵車百乘藩決野宿凡五日造廢壘焉公據鞍少選當機立斷輒罷其役飛章以聞宸襟洞開疑謀冰釋因詣闕而白其狀上嘉納慰勞適屬親試貢士命近臣考甲乙科第俾公預焉東堂校文時推精識西清賜對帝善其

言數日又命公撫巡陝西緣邊諸郡且以便宜從事凡七旬復命上謂公曰天官書上將次將位在文昌宮漢宣亦云邊境有事左右之臣皆將帥也文武是憲內外迭處亦何常之有公不能諭上旨翌日有獲下之拜上以太原西北勁兵處控帶雁門雲中匈奴之所走集思得賢帥付以師律即命公兼并幽等州經略等使判并州事盡護諸將倚為長城又下詔案行邊塞周視亭障并土嚴凝窮冬尤劇擐甲胄者或至墮指襲狐貉者僅如

懷冰公夙駕載馳蒙犯霜霰且多飲醇酒以禦寒氣因傷肺得疾頗施鍼砭忽瘍潰于脛流血石餘四體蕭然僅存微喘上遣中使太醫冠蓋相望又別賜手札丁寧款密初蒙藥石之効未任軍旅之事適會府州有所經度公將力疾而往上亟令止之雖漳濱有瘳而衛幕多故伐謀制勝固可以坐籌破敵鏖兵亦難于卧護乃降優詔俾之來朝方將驗上池之十全延明庭之三接出驅六轡授鉞以專征入序九功登岩廊而論道為國

方名播美於聲詩致君堯舜躋俗於仁壽如何奄忽乃
至云亡里巷輟舂播紳揮涕管公明不及嫁娶遺恨終
天張元伯頓隔死生緒言在耳嗚呼即以其年十二月
壬申歸葬于河南府新安縣暖泉鄉祔于先塋禮也公
歷階至金紫策勲上柱國視秩水土兼職風憲三進爵
為郡公真食至四百戶功臣之號凡三加焉祿位官封
亦云盛矣一子延年秘書省正字始七歲雖在稚齒了
無童心擗踊哀摧啜泣孺慕出于天性殆過成人貌是

遺孤庶乎有後公母范陽盧氏累封濮陽郡太夫人夫人
滎陽鄭氏故殿中丞處升之女封北海郡夫人皆以
公貴也兄若訥若虛早亡若愚今任大理評事通判台
州公於昆弟中為最幼號州號略簿若冲從父弟也大
理評事維周前河南永城簿智周兄之子也皆由公而
成立焉公眉宇秀拔丰神標映體二鄰幾識探繫象下
學上達文成雅誥推已恕物殆過放麗之仁虛受兼容
乃有涵牛之量善談名理聽之者更僕忘疲多識典故

扣之者撞鐘輒應品題人物汝南之子將坐鎮雅俗東
晉之安石挹其儀表者若披雲霧與之游從者如薰椒
蘭蓋所謂鑽之彌堅仰之彌高澄之不清撓之不濁者
也公在先朝時為北門學士與故刑部侍郎張公洎同
日送上天子喜金鰲之得賢詠嘉魚而申美特詔宣演
國樂魚龍雜戲近臣咸預式宴盡歡時方隅未寧邊候
屢警在於內署實司密命每天子臨便坐決章奏軍書
手詔急於星火斧戾之側授簡立成曲盡事機不加點

竄秉筆者推之掌審官之柄也如良工度材輪轅咸適
其用雖小人懷土胡越不違其情罷謫蒙於安全淑慝
以之區別居中樞之地也聲竭謨猷參決機會守正持
重曾不將迎憂邊思職屢蒙嘉獎屬疊起益部盜據坤
維絀湯網者居多皆呂刑之不宥賴公全活實繁有徒
且以慎密自持彌綸無迹詭詞而出雖溫樹以不言陰
德豈誣在里門而終大嘗以為百年之計莫如樹人三
代之昌皆由得士姑務引翼以答恩遇初司馬之舉善

外不避讎鄭當時之薦賢言之有味又以難進易退儒
者之行既得患失鄙夫所為乃辭祿樞府退就書殿士
林歌頌堆案盈几馳競頓息風俗歸厚既而述唐虞之
二典極班馬之三長西狩終篇南箕起謗或以不署宰
衡是為專美或以倒置昭穆於焉瀆宗公討尋故實援
引詔令廷諍數四策書乃定羣邪側目正人增氣領選
部也山公啓事多所薦陳掌秋曹也不疑平反號為寬
大權蒞京轂也獄囚數百一旦決之桴鼓稀鳴鈎距靡

設雖曰浩穰殆臻清淨出撫魏郡其政亦同乃有元戎
貴侯高牙大旆提七校之師中人內侍銀璫左貂從九
天而降公卮酒大載率以交驩郊勞飲餞曾無違禮奉
縉靡給私帑屢空坦然放懷不以屑慮及罷上郡之後
而晉民息肩握大鹵之兵而胡騎屏跡乃至易簣而沒
家無餘財行路之間人皆流涕非誠信素著譬李廣之
不言仁惠見思同子產之遺愛者安能及是哉公有德
有言多材多藝精覈數術善評書畫雅好班固漢書常

日讀一卷周急好施勞謙善下多所折券未嘗治產收
養孤幼侔邱成分宅之仁協比親戚掩游吉亢宗之說
勤接士類皆虛往而實歸善與人交必相先而莫逆薦
引後進有知人之明購求墜簡侔秘書之副每燕居私
第角巾東道叩虛課寂味茲玄闕近年深信佛乘雅習
禪觀隱几終日陶然自得歸全之明日上遣近侍求兩
朝策書遺草若冲等搜於巾箱盡以進御且述素志願
得薄葬免於勞民上亦允其請茂陵遺札幸天子之見

求京兆新阡固鄉人之不犯族子光祿寺丞易卓犖稽古時之聞人集公生平文章為二十卷某辱公之顧為日斯久道同氣合心照神交親奉齋終幸無怛化知音逝矣空絕伯牙之絃冢樹蒼然誰表延陵之墓含酸隕涕且為之銘銘曰

明堂肇基衆材具施如何棟梁中道而隳元首睠懷同體是宜吁嗟股肱一旦而虧腹背何益鍛茲六翮砥礪奚為喪我垂棘人失司南國亡遺直空餘話言布在方

策嗟太山兮其顏悲玉樹兮將埋悵浮生兮朝露閱英
魂兮夜臺伊南州之高士兮徒漬酒以申哀背鮮原兮
臨紫陌啓新阡兮從舊域嚴封樹兮禁樵蘇志泉扃兮
刻金石諒西土之耆老兮盍樹碑以表德

宋故翰林侍讀學士朝奉大夫右諫議大夫騎
都尉賜紫金魚袋滎陽潘公墓誌銘

咸平初天子端委穆清順考古道思近耆德樂聞話言
於是徵漢代金華之舊聞考唐室翰林之故事特置侍

講學士之職時予從祖七兵尚書故戶部夏侯貳卿今侍郎河間邢公中丞呂公竝預茲選後三歲今丞相畢公自上黨驛召既至即以命之又再歲自郎署擢河南潘公為諫議大夫授以茲任八年之間六人而已公亦既拜命人無間言時屬天驕犯邊軍烽日警天子將躬秉武節展義兩河而公以肅乂之姿處切近之地盱朝備問言多沃心中涓諭旨退必削橐及輿駕薄伐勤勞扈從晝駢乘於襄野夕宿衛于鈎陳從羽獵於儲胥陪

玉食於雲幄蒙犯霜霰因而遘疾猶親奉宸旨致祭洪
河沈璧浮牲精意懇到及復命行在移幸澶淵晨趨暮
召夙夜匪懈中乾愈甚束帶不任王人國醫存省相繼
嘉言密奏啓沃未忘美疢漸滋皇慈彌渥特奉明詔先
還上都肩舁啓行郵亭先置星言夙駕有加無瘳及旅
愴班旋膏肓沈痼精爽將竭方寸不亂月正元日殆於
彌留猶召故人執手為別且占遺奏不令託孤歎逝者
之如斯痛主恩之未報言訖瞑目至夕奄然皇上軫悼

良臣贈襚加等以其子太廟齋郎汝士為大理評事正
字汝礪為太常奉禮咸賦以祿俾之終喪又詔有司給
方舟載其柩歸葬豫章從遺志也恩禮之厚無以為比
公諱慎修字成德其先滎陽中牟人唐末避亂遷於閩
粵治產業遂為著姓當王氏之偏霸也曾祖武源以
丘園之秀預弓旌之招受署福州古田令祖崇裔種德
務滋懷才不試世難方棘肥遯終身烈考承祐屬雲雷
之遘屯負公台之偉量嘗事吳為蘄州法曹掾郡守以

非法致死罪抗議不奪投手版而歸王延政據建安且欲倚以為相時閱牆結讐尋戈繼日引經義而廷諍因禁錮而家居江南平建州若得劇孟之一敵國也累服大僚專掌劇務辭榮致政得刑部尚書歸隱洪州之西山優游沒齒妣清河張氏以從夫之貴封本郡君而公之顯祖贈太常少卿祖妣河間邢氏封本縣太君皆由尚書之故也公少負俊才習聞義訓觀書學劍包文武以兼資點漆凝脂越風塵而特秀纔十餘歲隨先尚書

歸金陵得秘書省正字歲滿遷校書郎未幾入省為水部員外郎賜五品服纔冠歲矣俄遷膳部先府君懸車告老公求便官就養得知洪州豐城縣歲餘以憂解職卒哭起復舊官改上元令以刑部員外郎知雜賜服金紫執法甚平持憲尤肅江右者舊至今稱之除水部郎中兼起居舍人判待制院領郡國之上書評諸曹之奏議蓋一時之劇任也開寶末蚩尤之旗亘天龍驤之師渡水公將危邦之命以市宴為名使交兵之間履不測

之險既陳土貢於宰旅且留別館於都亭時後主先命
同氣之親來謝不朝之罪羈縻未遣休戚攸同王師所
加捷音繼至金湯失守顧宗國之將亡玉帛旅庭齒外
臣而致賀卽吏懼其後至所司督其不供公介然抗議
以為不可每內朝稱慶但拜章待罪太祖重其知禮嘉
其有辭特遣貴臣親諭上旨改命供帳增給餼牽及青
蓋來朝朱扉賜第太祖以公質性忠厚特授太子右贊
善大夫俾事故君是為上介思喬木於故國尚見世臣

曳長裾于王門兼掌記室太宗嗣位以恩例累進階勲
後主考終由府罷復預朝請歷太常博士虞部倉部考
功三員外郎郎中出通判壽州知湖州梓州凡十年在
外故鄧帥太傅李公典領中秘書方求碩儒以充近署
遂引公入直秘閣出入交戟偃息周廬刊正遺編蓋手
不釋卷祇膺清問必膝之前席善談名理言為陽秋勤
接士類心無城府江東人物率執贄而宗予漢庭公卿
多致恭而尚齒允所謂南州之高士儒林之丈人也然

自博極羣書優游一紀素髮垂頷僅類郎潛凝塵滿席
不嬰世務婚嫁未畢屢求典於方州年德俱高果入參
於近侍將記言於惇史遽歸全於厚夜嗚呼享年六十
九公前娶汝南周氏今夫人東海徐氏封本縣君即故
中書侍郎上饒郡公景遜之女也建康大姓連姻戚里
柔儀惠問宜家睦族俄遘未亡之戚實深偕老之痛率
其二子奉公之喪歸于洪州祔先尚書之塋從治命也
公四子長玄亮端拱中舉進士補大名朝城尉次玄成

皆早亡五女長適福州寧德令邵良弼次適蘇州常熟
令岑頤先公而逝次適興元府觀察推官龔紀次適大
理寺丞張安期故叅政刑部侍郎洎之子也一尚幼而
許嫁待年而未行公風度詳閑襟懷夷曠旁通多可虛
受兼容雅善棊奕僅臻絕品先皇帝萬幾之暇常以方
罪自娛公屢蒙三接之召親奉一枰之戲退而作棊說
以獻天子異之蓋多藝多材姬公自許執御執射仲尼
之言雖餘力之使然亦天機之獨妙叅掌記注猶及金

匱之闕文屢奉宴遊嘗續柏梁之高韻生平著撰疊委
筐箱諸郎等方在哀迷未遑論次長卿遺札冀武皇之
見求叔夜孤兒幸山公之尚在永懷舊德髣髴緒言揮
涕濡毫以志陵谷銘曰

全吳之地續唐之祀公臣舊邦罔有貳事開寶之季王
師摩壘公使交兵茲亦盡瘁一心事君典訓攸聞公之
奉上茂貞純兮十年不調先民是悼公之為郎殆華皓
兮西清北門宴見諮詢簪筆持橐奉至尊兮靈旗大輅

徂征赫怒巾車脂轄陪天步兮公已白首始邁元后富
貴之來逼蒲柳兮公踐玉堂入侍聖皇寒暑之疹在膏
肓兮時不與兮道攸遠志將亨兮命彌蹇旅櫬歸兮春
草長銘旌飄兮白日晚瞻冢樹兮成行悲逝川兮不返
永齋志兮首丘長垂名兮汗簡

武夷新集卷九